

**Commissie van den ghedeputeerden des Princen van Orangien, van den Staten van Hollandt ende Zeelandt**

Wy, Willem by der gratien Gods, Prince van Orangien, grave van Nassouw, van Catsenellenbogen, van Vianden, van Diets, van Bueren, van Leerdam etc., heere ende baron van Breda, van Diest, van Grimbergen, van Arlay, van Nozeray, etc., burchgrave van Antwerpen ende van Besancon, stadhoudere ende capitain generael over Hollant, Zeelant, West-Vrieslant ende Utrecht, midtzaders die ridderschap, edelen ende steden van Hollant ende Zeelant, representerende den Staten van den selven landen, doen condt eenenyegelijcken dat alsoe Godt almachtich uuyt sonderlinge genade geliefet heeft te presenteren die occasien ende middelen waer deure die Nederlanden, die steden ende ingesetenen vandien die door die uuytheempsche Spaensche natie ende heurlieder tyranlijcke heerschappie over den selven landen eenige voirleden jaeren tot noch toe in eene jammerlijcke beroerte, twist, onvrede ende binnenlantschen crijch gebracht ende gehouden zijn geweest eenemael wederomme vereenicht mitsgaders die oude vrintschap, neeringe ende welvaert onder den gemeynen ondersaten der voirs. landen gerestitueert, oyck de selve landen voortane in heure gerechticheden, vrydomme ende voirsvoet gestyft ende gesterct souden mogen worden tot Gods eere, dienste des Co. Ma<sup>leyt</sup>, ruste ende welvaert van den ingesetenen deser landen daer toe alle goede ondersaten ende liefhebbers des Vaderlants mits rechte hen aenbieden ende te meer thoonen bereyt, uuyt dien een yegelijck bekent ende openbaer is geworden den boosen raet ende voirnemen der voirs. Spaengnaerden ende heuren aenhangeren als tenderende naer 't lange gedult van heuren onverdrachelicken moet wille ten uuytersten tot geheele ruyne, bederfnisse ende eeuwige slavernye van allen den Nederlantschen Provincien ende den getrouwten ingesetenen van dyen daerinne de selve oyck geschapen waren te geraecken in dien op 't vertreck oft 't verdrijven der Spaignaerden ende heuren aenhangeren voir al ende by andere behoirlycke remedie sonderlinghe van gemeyne macht ende eendracht der Nederlanden in tijts niet en wordden voirsien ende dat naer eenige vriendelijcke interpellatien ende vermaeningen by zijne Ex<sup>lio</sup> ende de voirgaende Staten van Hollant ende Zeelant aen den anderen Provincien van dyen desen aengaende gedaen die Prelaten, Edelen ende Steden, representerende de Staten van Brabant, Vlaenderen ende andere Provincien daer toe schijnen bewegen ende ganschelijck geneycht te zijne in

der vuegen dat om der Nederlanden voirs. welvaert, gerusticheyt ende een-dracht te voirderen zijne Ex<sup>II</sup> metten voirn. Staten te weder zyden overcommen zijn met malcanderen te vergaderen ende in communicatie te treden, tevreden zijnde zijne Ex<sup>II</sup> ende de Staten van Hollant ende Zeelant, vervangende ende hen sterck maeckende in desen voir die van Bomnel ende allen anderen heuren geassocieerden, tot dyen eynde heuren gecommitteerden te seynden tot sekeren daghe binnen der stadt van Ghendt, soe EEST, dat zijne Ex<sup>II</sup> mitzgaders de voirnocomde Staten van Hollant ende Zeelant inder voirs. qualiteyt gecommitteert hebben ende committeren midtz desen den edelen erntfesten ende zeer besonderen Jonckheeren Philips van Marnix, heere van Sint Aldegonde, Arent van Dorp, Willem van Zuylen van Nyeveld, Adriaen vander Mylen, Cornelis Conincx, Pauwels Buys, Pieter de Rijcke, Anthuenis vander Zickelen ende Andries de Jonghe omme van wegen ende uuyten naeme der selfder zyne Ex<sup>II</sup> ende Staten heurlieden gesamentlijck oft 't meerdeel van hen te vindene in de voirs. communicatie binnen der stadt van Gendt ende metten voirn. Staten ende andere Nederlantsche Provincien oft heuren wettelycke gedeputeerde aldaer verschijnende te handelen, adviseren ende besluyten sulcx als sylieden ten besten vrede, vrientschappe ende eenicheyt der voirs. landen ende der ingesetenen van dyen dienelijck ende voirdelijck sal mogen zijn, regard nemende op de voirgaende verclaringe ende deuchdelijke offre van wegen Zijne Ex<sup>II</sup> ende voirn. Staten van Hollant ende Zeelant met heure geassocieerde tot meermal ende bisondere in den lesten vredehandel metten commissarisen van den Coninck tot Breda ende 't gene aldaer voirder op 't stuck van de pacificatie gehandelt ende gedaen mach zijn, waerop die voirn. gecommitteerde zullen mogen voirt varen indien sulcx wordt vereyscht oft noot zij, gevende den voirn. gecommitteerde oft meerendeel van henlieden des nyettemin ende voirts volcommen macht ende bevel generael ende speciael mit den voirn. Staten van den anderen Provincien in dezen te doen ende 't accorderen sulx als eenichssins tot voirderinge ende verzekерtheyt van 't gemeyn beste ende insonderheyt tot wederstant, crenckinge ende verdrijvinge der voirs. Spaingnaerden als al gemeyne vyanden van 't vaderlant ende de gemeyne ruste geraetsaem ende oirboirlick bevinden sullen, tot dyen eynde oyck met die van den anderen Provincien hen te veroblicheren ende te verbinden onder alsulcke redelijcke conditien ende articulen als eenichssins met Godt ende eere sal kunnen oft mogen geschieden tot gerusticheyt ende welvaert der landen, belovende zyne Ex<sup>II</sup> ende de Staten van Hollant ende Zeelant voirn. in trouwe ende eere overgoet, vast ende van weerden te houdene ende voir soe vele hen aengaet onwederoepelick ende onverbreckelic 't onderhouden ende doen onderhouden, wes by den selven heuren gecommitteerden, als boven verhaelt, ende in 't gene voirs. is, getracteert oft gehandelt zal worden sonder daer jegens te doen oft laten geschieden in eeniger wijse directelick of indirectelick daer voere hen selven verbindende midtz desen de personen ende goeden van hun ende generalijck van allen den inwoenderen van Hol-

lant ende Zeelant ende heuren geassocieerden jegenwoirdich ende toecomende egheene uuytgesondert. Toorconden deze by zijne Ex<sup>lio</sup> ende ter ordinantie vande voorn. Staten van Hollant ende Zeelandt ondergeteeckent ende met heuren segelen bevesticht. Gedaen tot Middelborch, den XII<sup>tem</sup> octobris ende tot Delft, den XIIII<sup>tem</sup> septembris anno XV<sup>e</sup> tzeventich zesse, onderteeckent, Guillame de Nassau. Ten bysonderen bevel der Staten van Hollant, onderteeckent, P. Buys. By expresse bevele der Staten van Zeelant, geteeckent, Taymon ende gesegelt met drye segelen van rooden wasse uuyt-hangende met dobbelen steerte van parchemijne.